



SLUŽBA ZA REVIZIJU FINANSIRANJA POLITIČKIH STRANAKA

Na osnovi člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O REVIZIJI
GODIŠNJEG FINANSIJSKOG IZVJEŠTAJA ZA 2010. GODINU I POSTIZBORNOG
FINANSIJSKOG IZVJEŠTAJA – OPĆI IZBORI 2010.
DEMOKRATSKE PARTIJE – DRAGAN ČAVIĆ

Broj: 03-07-6-378/11
Sarajevo, 28. juni 2012. godine

SADRŽAJ:

MIŠLJENJE	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije.....	5
Cilj revizije.....	5
Obim revizije.....	5
4. PRETHODNE REVIZIJE	5
5. NALAZI I PREPORUKE	6
5.1. NALAZI.....	6
5.2. PREPORUKE	10

MIŠLJENJE

Služba za reviziju finansiranja političkih stranaka izvršila je reviziju finansijskih izvještaja Demokratske partije – Dragan Čavić i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora održanih u oktobru 2010. godine.

Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.

Naša odgovornost je izraziti mišljenje na osnovi revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka i članom 15.10 Izbornog zakona BiH.

Revizija je na osnovi uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Utvdili smo da Demokratska partija – Dragan Čavić u izvještajnom periodu nije postupila u skladu sa odredbama člana 4. stav (2), člana 6., člana 8. stav (2) i člana 11. stav (1) i stav (3) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Demokratska partija – Dragan Čavić u 2010. godini postupala u skladu sa odredbama Zakona o finansiranju političkih stranaka i člana 15.10 Izbornog zakona BiH.

1. UVOD

Služba za reviziju finansiranja političkih stranaka izvršila je reviziju finansijskih izvještaja Demokratske partije – Dragan Čavić i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2010. godine.

Revizija je preduzeta u skladu sa članom 14. stav (1) Zakona o finansiranju političkih stranaka, članom 24. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Demokratska partija – Dragan Čavić ostvarila je ukupne prihode u iznosu od 140.148,56 KM¹, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u ukupnom prihodu %
1	Članarina	1.431,00	1,02%
2	Prilozi fizičkih lica	54.153,00	38,64%
3	Prilozi pravnih lica	24.117,49	17,21%
4	Prihodi od imovine	9,05	0,01%
5	Prihodi od pr.lica	0,00	0,00%
6	Prihodi od poklona	0,00	0,00%
7	Prihodi iz budžeta	59.662,12	42,57%
	Ostali prihod	775,90	0,55%
	Ukupni prihodi:	140.148,56	100,00%

U godišnjem finansijskom izvještaju Demokratska partija – Dragan Čavić iskazala je ukupne rashode u iznosu od 146.271,79 KM.

2. PREDSTAVLJANJE POLITIČKE STRANKE

Naziv političke stranke: Demokratska partija – Dragan Čavić. Skraćeni naziv stranke je DP.

Demokratska partija je Rješenjem broj: Rp-1/09 od 10.02.2009. godine upisana u registar političkih organizacija kod Osnovnog suda u Banjoj Luci. Rješenjem broj: Rp-1/09 od 31.05.2010. godine izvršen je upis promjene naziva stranke.

¹ Podaci sa ispravljenog obrasca 3 (ukupni prihodi) političke stranke, koji je dostavljen dana 13.12.2011. godine.

Sjedište političke stranke je u Banjoj Luci, ulica Petra Kočića br. 41.

Lica ovlaštena za zastupanje stranke su: Dragan Čavić, predsjednik, Momčilo Novaković i Slobodan Šaraba, potpredsjednici i Vojislav Gligić, generalni sekretar.

Lice ovlašteno za podnošenje finansijskih izvještaja za 2010. godinu je Ljiljana Tešić.

Prema podacima iz godišnjeg finansijskog izvještaja za 2010. godinu, organizacionu strukturu Demokratske partije – Dragan Čavić čine:

- Gradski odbor Banja Luka i
- 23 općinska odbora.

3. OPIS REVIZIJE

Predmet revizije su godišnji finansijski izvještaj za 2010. godinu i postizborni finansijski izvještaj – Opći izbori 2010. godine Demokratske partije – Dragan Čavić, i to sljedećih organizacionih dijelova:

- Gradski odbor DP Banja Luka,
- Općinski odbor DP Trebinje i
- Općinski odbor DP Srbac.

Cilj revizije je revizoru omogućiti da izrazi mišljenje o tome da li je Demokratska partija – Dragan Čavić u izvještajnom periodu postupala u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine.

Obim revizije finansijskih izvještaja Demokratske partije – Dragan Čavić obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode iz budžeta i troškove kampanje.

4. PRETHODNE REVIZIJE

Služba za reviziju je obavila pregled godišnjeg finansijskog izvještaja Demokratske partije – Dragan Čavić za 2009. godinu. Nakon obavljenog pregleda za 2009. godinu, Služba za reviziju je izdala Izvještaj o pregledu godišnjeg finansijskog izvještaja sa mišljenjem revizora, nalazima revizije i preporukama da stranka treba postupati u skladu sa odredbama člana 11. stav (1) i stav (3) Zakona o finansiranju političkih stranaka.

Nerealizirane preporuke:

Na osnovi uočenih nedostataka u godišnjem finansijskom izvještaju za 2010. godinu, utvrđeno je da Demokratska partija – Dragan Čavić nije ispoštovala preporuke iz Izvještaja o pregledu godišnjeg finansijskog izvještaja za 2009. godinu, odnosno i dalje postupa suprotno odredbama člana 11. stav (1) i stav (3) Zakona o finansiranju političkih stranaka.

5. NALAZI I PREPORUKE

5.1. NALAZI

a) Demokratska partija – Dragan Čavić prekršila je odredbe člana 6.² i člana 4. stav (2)³ Zakona o finansiranju političkih stranaka.

Demokratska partija – Dragan Čavić Banja Luka nije u obrascu 3-e (nenovčane donacije i prilozima koje stranka nije imala obavezu platiti) iskazala nenovčane donacije u ukupnom iznosu od 3.300,00 KM, čime je prekršila odredbe člana 6. Zakona o finansiranju političkih stranaka.

Demokratska partija – Dragan Čavić Banja Luka nije u obrascu 3-e iskazala nenovčanu donaciju fizičkog lica koje u 2010. godini stranci pružalo knjigovodstvene usluge, bez naknade. Prema izjavi fizičkog lica, vrijednost knjigovodstvenih usluga za 2010. godinu iznosi 1.800,00 KM.

Također je utvrđeno da stranka nije iskazala donaciju pravnog lica u vidu besplatnog korištenja poslovnih prostorija, površine 15 m².

Prema izjavi predsjednika Demokratska partija – Dragan Čavić, prostorije su korištene povremeno sve do 01.11.2010. godine, a vrijednost zakupa i režijskih troškova koje stranka nije imala obavezu plaćati je 150,00 KM mjesečno, odnosno 1.500,00 KM za 2010. godinu.

Obzirom da Demokratska partija – Dragan Čavić u svojoj dokumentaciji ne posjeduje račun, odnosno dokaz o iznosu zakupnine koju bi stranka platila da je imala obavezu platiti, prekršene su i odredbe člana 4. stav (2) Zakona o finansiranju političkih stranaka.

b) Demokratska partija – Dragan Čavić prekršila je odredbe člana 8. stav (2) Zakona o finansiranju političkih stranaka.⁴

Na osnovi obavljene revizije finansijskih izvještaja, utvrđeno je da je stranka primila priloge koji su zabranjeni odredbom člana 8. stav (2) Zakona o finansiranju političkih stranaka u ukupnom iznosu od 1.000,00 KM, i to:

- Demokratska partija – Dragan Čavić primila je prilog pravnog lica “Higra“ d.o.o. Bijeljina u iznosu od 500,00 KM. Ovo pravno lice je tokom 2010. godine imalo sklopljen ugovor sa Općinom Bijeljina.
- Dana 23.09.2010. godine Demokratska partija – Dragan Čavić je primila prilog pravnog lica “Rial Šped“ d.o.o. Doboj Istok u iznosu od 500,00 KM. Revizijom je utvrđeno da je ovo pravno lice tokom 2010. godine imalo sklopljene ugovore sa Općinama Tuzla, Lukavac i Tešanj.

² Član 6. stav (1) Politička stranka dužna je voditi evidenciju o svojim priložima fizičkih i pravnih lica, te izdati potvrdu fizičkom i pravnom licu od kojeg je primila prilog. Član 6. stav (2) Ako ukupni iznos priloga jednog lica iz stava (1) člana 4. ovog zakona prelazi 100,00 KM, ta uplata mora se unijeti u finansijski izvještaj u skladu sa članom 11. Zakona o finansiranju političkih stranaka.

³ Članom 4. stav (2) je propisano da pravno lice koje stranci pruži uslugu ili proda proizvod mora stranci da ispostavi račun, bez obzira na to ko snosi plaćanje usluge ili proizvoda, odnosno, bez obzira na to da li je usluga pružena ili proizvod dat bez naplate.

⁴ Privatne firme koje obavljaju javne usluge na osnovi ugovora sa vladom ne mogu finansijski pomagati političke stranke.

c) Revizijom je utvrđeno da je stranka prekršila odredbe člana 11. stav (1) i stav (3) Zakona o finansiranju političkih stranaka.

Na osnovi obavljene revizije utvrđeno je da Demokratska partija – Dragan Čavić nije vodila potpune evidencije o svojim prihodima i rashodima i nije obrasce godišnjeg finansijskog izvještaja popunila u skladu sa odredbama Pravilnika o godišnjim finansijskim izvještajima političkih stranaka, čime je prekršila odredbe člana 11. stav (1) i stav (3) Zakona o finansiranju političkih stranaka.

- (1) Revizijom finansijskih izvještaja utvrđeno je da Demokratska partija – Dragan Čavić nije uspostavila potpune knjigovodstvene evidencije o prihodima, rashodima i obavezama stranke, niti je uspostavila pravilno blagajničko poslovanje.

Služba za reviziju je utvrdila da Gradski odbor DP nije evidentirao sve rashode i obaveze nastale u 2010. godini, tako da ni troškovi ni obaveze iskazane u poslovnim knjigama ne odgovaraju stvarnom stanju. Također je utvrđeno da stranka u poslovnim knjigama na kontima obaveza prema dobavljačima ima iskazan negativan saldo. Na osnovi konfirmacija dobavljača i uvidom u analitička konta troškova i obaveza, utvrđeno je da stranka nije evidentirala troškove u momentu nastanka obaveze.

Uvidom u poslovne knjige i finansijski izvještaj, utvrđeno je da je Demokratska partija – Dragan Čavić izvršila isplate fizičkim licima po računima za utrošeno gorivo u ukupnom iznosu od 8.536,44 KM.

Na osnovi poslovne dokumentacije stranke i kopije računa na osnovi kojih su vršene gotovinske isplate sa blagajne, nije moguće utvrditi da je trošak nastao u svrhu obavljanja stranačkih poslova. Služba za reviziju je utvrdila da politička stranka nije izdavala naloge za službena putovanja, niti da ima bilo koju drugu dokumentaciju na osnovi koje bi bilo moguće utvrditi mjesto i svrhu putovanja. Također, revizijom je nije utvrđeno da stranka posjeduje vozila.

Imajući u vidu da stranka ne posjeduje vozila, odnosno da nema zaposlene, a da je vršila isplate fizičkim licima po računima za gorivo koje sa poreskog aspekta imaju karakter ličnih primanja, Demokratska partija – Dragan Čavić je bila obavezna izvršiti obračun poreza na dohodak i pripadajuće doprinose na iznos od 8.536,44 KM.

Obzirom da, u skladu sa poreskim propisima, stranka nije obračunala i platila porez na dohodak i pripadajuće doprinose na isplaćena sredstva, u poslovnim knjigama i finansijskom izvještaju troškovi i obaveze po ovoj osnovi nisu iskazani.

Uvidom u obrasce Postizbornog finansijskog izvještaja – Opći izbori 2010. godine utvrđeno je da je DP iskazala troškove propagande u ukupnom iznosu od 74.162,77 KM, dok su troškovi izborne kampanje u godišnjem finansijskom izvještaju iskazani u iznosu od 99.123,92KM, što ukazuje na činjenicu da su evidencije o troškovima kampanje neadekvatne.

- (2) Demokratska partija – Dragan Čavić nije u obrascu 2 iskazala podatke o deviznom računu i nije pravilno iskazala promet ostvaren putem transakcijskog računa OO Rudo, čime je prekršila odredbe člana 11. Pravilnika o godišnjim finansijskim izvještajima političkih stranaka.

- GO DP Banja Luka nije u godišnjem finansijskom izvještaju iskazao devizni račun otvoren u NLB Razvojnoj banci a.d. Banja Luka, niti promet koji je ostvarila u 2010. godini. Uvidom u poslovne knjige utvrđeno je da je stranka putem ovoga računa ostvarila promet ulaza u iznosu od 5.867,49 KM, odnosno promet izlaza u iznosu od 5.867,49 KM.
- Revizijom je utvrđeno da je početno stanje na transakcijskom računu OO Rudo iznosilo 775,90 KM, dok u obrascu 2 godišnjeg finansijskog izvještaja stranka nije iskazala početno stanje. Isto tako, stranka je iskazala promet ulaza u iznosu od 775,90 KM, mada putem ovog transakcijskog računa nije imala priliv sredstava u izvještajnom periodu.

- (3) Služba za reviziju je utvrdila da DP nije obrasce priloga fizičkih lica (obrazac 3.a) popunila u skladu sa odredbama člana 14. Pravilnika o godišnjim finansijskim izvještajima političkih stranaka.

Uvidom u izvode sa transakcijskog računa, utvrđeno je da stranka nije pravilno iskazala priloge pojedinih fizičkih lica koja su dala više priloga u toku 2010. godine, odnosno stranka je priloge koji su niži od 100,00 KM iskazala na stavci priloga nižih od 100,00 KM iako je isto fizičko lice tokom godine dalo priloge koji u ukupnom iznosu prelaze 100,00 KM.

Tako je GO DP Banja Luka iskazao priloge fizičkog lica u ukupnom iznosu od 1.285,00 KM, mada je ovo fizičko lice stranci dalo priloge u ukupnom iznosu od 1.345,00 KM. Prilog u iznosu od 60,00 KM stranka je iskazala na stavci priloga nižih od 100,00 KM.

Također, podaci o priložima koje je primio OO Trebinje su pogrešno iskazani u obrascu 3.a ovog odbora. Revizijom je utvrđeno da je stranka na stavci priloga fizičkih lica čiji je iznos niži od 100,00 KM iskazala priloge u ukupnom iznosu od 750,00 KM, dok je od fizičkih lica primila priloge niže od 100,00 KM u ukupnom iznosu od 480,00 KM.

Služba je utvrdila da su prilozima jednog fizičkog lica iskazani za 100,00 KM, odnosno drugog fizičkog lica za 50,00 KM manji.

Isto tako, utvrđeno je da je stranka u zbirnom iznosu priloga koji su niži od 100,00 KM iskazala priloge fizičkog lica koje je dala priloge u ukupnom iznosu od 120,00 KM.

Ističemo da je stranka na stavci priloga nižih od 100,00 KM trebala iskazati samo priloge onih fizičkih lica čiji ukupan iznos tokom jedne kalendarske godine ne prelazi 100,00 KM.

- (4) Demokratska partija – Dragan Čavić nije u obrascu 3-e (nenovčane donacije i obaveze koje stranka nije imala obavezati platiti) iskazala nenovčane donacije fizičkog i pravnog lica u ukupnom iznosu od 3.300,00 KM, čime su prekršene odredbe člana 16. Pravilnika o godišnjim finansijskim izvještajima političkih stranaka. Stranka je prekršila i odredbe člana 21. istog pravilnika jer nije iskazala troškove zakupa poslovnih prostorija u iznosu od 1.500,00 KM i troškove knjigovodstvenih usluga u iznosu od 1.800,00 KM.

- (5) Služba za reviziju je utvrdila da Demokratska partija – Dragan Čavić nije vodila potpune evidencije o svojim troškovima i da podaci o troškovima u obrascu 4-1 (režijsko-administrativni i ostali troškovi) nisu pravilno iskazani, čime su prekršene odredbe člana 21. Pravilnika o godišnjim finansijskim izvještajima političkih stranaka.

- Prema Ugovoru o zakupu poslovnih prostorija koje je koristio OO Trebinje mjesečna zakupnina za poslovne prostorije iznosila je 270,00 KM, odnosno za 2010. godinu

3.240,00 KM. Uvidom u obrazac 4-1 i poslovne knjige, utvrđeno je da su troškovi zakupnine iznosili 2.970,00 KM, odnosno da su troškovi zakupa iskazani manjima za 270,00 KM.

- Stranka nije u obrascu 4-1 OO Srbac iskazala troškove zakupa u iznosu od 3.600,00 KM, niti je iskazala obaveze na osnovi zakupa prema fizičkom licu. Naime, na osnovi Ugovora o zakupu stambenog prostora od 26.05.2009. godine OO DP Srbac je na neodređeno vrijeme koristio prostorije u vlasništvu fizičkog lica uz mjesečnu zakupninu u iznosu od 300,00 KM.

- (6) Stranka nije pravilno iskazala troškove propagande u obrascu 4-2 (troškovi propagande), čime je prekršila odredbe člana 22. Pravilnika o godišnjim finansijskim izvještajima političkih stranaka.

Revizijom je utvrđeno da je stranka u obrascu 4-2 OO Trebinje iskazala troškove u iznosu od 720,00 KM, koji odnose na nabavku kalendara, odnosno koji direktno nisu vezani za kampanju.

Također je utvrđeno da je GO DP Banja Luka u obrascu 4-2 iskazao i troškove zakupa sala iz decembra 2010. godine u iznosu od 5.600,00 KM, kao i da je troškove reprezentacije u ukupnom iznosu za 2010. godinu iskazala u obrascu troškova propagande, mada su pojedini troškovi nastali u 2009. godini a isplaćeni u januaru 2010. godine.

Obzirom da se u obrazac 4-2 unose troškovi propagande, a da je Demokratska partija – Dragan Čavić učestvovala na Općim izborima 2010. godine, smatramo da je stranka u ovom obrascu trebala iskazati samo troškove koji se odnose na troškove kampanje za 2010. godinu.

Na osnovi svega navedenog, utvrđeno je da ni obrasci ukupnih prihoda (obrazac 3) i ukupnih rashoda (obrazac 4) godišnjeg finansijskog izvještaja nisu pravilno popunjeni, čime su prekršene odredbe člana 13. i člana 20. Pravilnika o godišnjim finansijskim izvještajima političkih stranaka.

- (7) Služba za reviziju je utvrdila da stranka nije iskazala obaveze na dan 31.12.2010. godine, čime je prekršila odredbe člana 23. Pravilnika o godišnjim finansijskim izvještajima političkih stranaka.

Revizijom je utvrđeno da Demokratska partija – Dragan Čavić nije u obrascu 5 iskazala obaveze na osnovi zakupnine prema dobavljaču “Travunija“ a.d. Trebinje u iznosu od 270,00 KM i fizičkom licu u iznosu od 3.600,00 KM.

Također je utvrđeno da je stranka u obrascu 5 iskazala i negativan saldo obaveza prema dobavljačima “Elektroprivreda RS“ i “Trgoprom“, što nije uobičajeno prema važećim računovodstvenim propisima.

Troškovi predizborne kampanje

Demokratska partija – Dragan Čavić je postupila u skladu sa odredbama člana 15.10 Izbornog zakona BiH, odnosno u svrhu izborne kampanje je potrošila 74.162,77 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM⁵ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Demokratska partija – Dragan Čavić je u svrhu izborne kampanje mogla da potroši 753.374,53 KM.

5.2. PREPORUKE

Preporučuje se Demokratskoj partiji – Dragan Čavić da se pridržava odredbi Zakona o finansiranju političkih stranaka, a posebno na osnovi uočenih nedostataka se preporučuje:

- *da postupa u skladu sa odredbama člana 4. stav (2), člana 6., člana 8. stav (2) i člana 11. stav (1) i stav (3) Zakona o finansiranju političkih stranaka, i to:*
 - *da osigura odgovarajuću dokumentaciju (račune) za usluge pružene stranci,*
 - *da u finansijskom izvještaju prijavljuje sve priloge pravnih i fizičkih lica iznad 100 KM,*
 - *da se ne finansira zabranjenim priložima,*
 - *da vodi evidencije o svojim prihodima i rashodima, i*
 - *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.*
- *da prihode i rashode priznaje u momentu njihovog nastanka, a ne u momentu naplate ili plaćanja,*
- *da troškove kampanje u svojim poslovnim knjigama evidentira, a u finansijskom izvještaju iskazuje odvojeno od redovnih troškova propagande, i*
- *da uspostavi upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge (nalog uplate i nalog isplate; dokumenta na osnovi kojih se vrše isplate putem blagajne). Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definiranje visine blagajničkog maksimuma⁶.*

KOMENTAR:

U ostavljenom roku, Demokratska partija – Dragan Čavić nije dostavila primjedbe na Preliminirani izvještaj o reviziji godišnjeg finansijskog izvještaja za 2010. godinu i postizbornog finansijskog izvještaja – Opći izbori 2010. godine.

⁵ Član 15.10 stav (2) propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika općine odnosno gradonačelnika i za članove skupštine općine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

⁶ Blagajnički izvještaji se ne vode, a knjiženja u poslovnim knjigama se vrše mjesečno. Revizijom je utvrđeno da je stranka kroz blagajnu 7/10 isplatila račun u iznosu od 205,95 KM po rn. 906/10 od 10.11.2010. godine.

Zahvaljujemo ovlaštenom licu za finansijske izvještaje Demokratske partije – Dragan Čavić za dobru i korektnu saradnju tokom obavljanja revizije finansijskih izvještaja.

Hasida Gušić – šefica Službe za reviziju

Veliborka Kenjić – revizorica

Sanja Čabrilo – revizorica